

四庫全書

史部

欽定四庫全書

續資治通鑑長編卷三百五十四

宋 李燾 撰

哲宗

元豐八年夏四月丙寅上初御紫宸殿宰臣以下奏事
諸司猶未許對

丁卯大理寺卿王孝先等言獄空詔付秘書省仍令學
士院降詔獎諭

戊辰封上乳母竇氏為安康郡夫人

己巳詔再試進士及諸科武舉人罷今年御試內應直赴殿試者以前舉省試等第名次編排在今來正奏名之下不曾赴省試者即與正奏名進士同場別號試策一道 中書省勘會諸路官得替或已授別任因監司奏乞勒留在前任及發遣赴舊任與見任官同催欠負者今來赦書指揮百姓欠負者例各蠲減詔並令放罷內有見在任已發遣而本任未有新授官者並許還本

任編錄冊八年四月六日聖旨

庚午尚書省言河東路經畧使呂惠卿言河東勇敢以三百人為額本路止二百人請給微薄應募者少臣昨任鄜延路經畧使日奏請增三等請受借支省馬給與七分草料於延州置營差指使教習武藝自後應募稍衆欲依陝西路已得指揮從之 樞密院言近制大小使臣因見謝辭輒唐突者徒二年私罪欲乞諸班直諸軍忠佐親從親事官諸色人因入殿輒唐突者徒二年

情重者取旨本轄人科不覺察罪詔可

辛未禮部言尊太皇太后皇太后皇太妃冊請三年喪畢行禮從之 京東路都轉運使天章閣待制吳居厚

降知廬州以言者論其苛刻也

當考言者姓名韓璫錄劉安世語云元豐末京

東劇寇數千欲取掎克吏吳居厚投之鐵冶中賴居厚覺早間道遁去不然賊殺一都轉運使從官得晏然而

已乎

詔戶部侍郎李定取都提舉汴河堤岸司所領事

并提舉京城所課利條析以聞

五月乙未並罷都大提舉汴河堤岸司元豐二

年二月二十二日初置三年五月十二日改今名

詔尚書省左右司取在京

免行納支錢窠名取旨

舊錄云先帝以濁流入汴澱淤
湍急都人有水憂乃導洛通汴

置司提舉又官司市物迫行人供應吏並緣為姦至逃
已破產民患之乃等第納錢免充行役以錢募人供市
而官司禁不得市於民民得不擾至是姦臣欺罔簾帷
以為非是時先帝崩才越月變亂法度由此始其後事
無大小悉改革上未親政也新錄辨曰神宗皇帝嘗詰
興利之弊曰事太傷鄙細有害國體蓋深責有司之過
也凡所奉行失其本旨皆有意更去之詔書具在可考
而知通汴司本為救患免行錢本為便民其末在有司
皆近於興利之舉至是詔取索事目以定可否亦推神
宗之意而行之也自先帝以濁流入汴至未親政也一
百十六字

並刪去

又詔宗室官已至磨勘止法者該今年三

月六日覃恩並特與轉官依例加恩 又詔開封府界

京東京西河北陝西河東所養戶馬近已支價錢撥買
配填河東鄜延環慶路闕馬軍分自今府界并京東路
養馬指揮並罷 又詔京東京西路保甲養馬法元定
年限極寬民間易以應辦而有司不務循守妄有陳請
期限迫急遂致騷擾先帝已嘗降手詔詰責約束至今
猶不能奉行其兩路保馬宜令並依元降年限收買其
剩買過數目並以充次年分之數 又詔提舉京東路
保馬兼保甲楊景芬提舉京西路保馬兼保甲張脩並

令乘傳赴京於三省稟議改廢其後詔京東京西路保

馬等級分配諸軍餘數發赴太僕寺其格不應支配即

還民戶變易納所給價錢

舊錄云先帝以國馬不足追效邱乘之制寓馬於民量物

產給價立歲限使民市馬養之得自乘習緩急則集以
為用仍命弛其徭役法甚善司馬光言其非便遂罷新
錄辨曰宣仁參祖宗之制推明神宗之心保佑哲宗皇
帝以致元祐之治其公議在天下甚明而史官類出私
意取一時羣臣之議與神宗皇帝較其得失豈可以示
後世自先帝以國馬至非便遂罷六十字並刪去按此
時司馬光猶未上疏論民戶養馬不知舊錄何以云然
其後則光固謂不可也呂大防政目十二月二十二日
詔京東西路保馬四尺以上駁填軍鋪四尺
三寸以上騾從監牧餘給人戶變轉納錢

又詔在

京并京西及泗州所置物貨等場並罷在京委監察御史黃降駕部員外郎賈種民京西令本路轉運副使沈希顏泗州令權發遣江淮等路發運副使路昌衡點磨物數計會當職官吏交割椿管條析措置結絕事件以聞

四月八日七月十八日合參照

又詔元豐六年已前積欠夏秋稅

租及緣納錢物並依三月六日赦書指揮特與除放

中書省言今年正月九日赦書內外人戶見欠市易錢物並仰所屬勘會元賒請本息等錢并已納見欠數目

條具聞奏其息錢當議減放在京至今未見有司依赦以聞詔監察御史劉拯兵部員外郎杜常太府少卿宋彭年赴御史臺置局點磨所欠息錢大姓戶放七分小姓戶全放外合納數目關所屬依調催納仍曉諭人戶并具無欺弊聞奏限一月 又詔軍頭司應於後殿引見事如呈試武藝人申樞密院令承旨司官與軍馬司同共校試有妨嫌者即與不干礙軍馬司同試如並係干礙即與軍頭司同試皆具狀以聞應不呈試武藝人

並令軍頭司押赴樞密院審驗訖申牒所屬施行見謝
并軍回過軍並令門見門謝合賜例物及酒食等軍頭
司闕申依式令施行應合引見人如有自陳仰軍頭司
取問申樞密院以垂簾上未御後殿故也

元祐二年二月四日樞密院

又有申請

又詔諸官司見行條制文有未便於事理應改
者並具其狀隨事申尚書省樞密院即面得旨若一時
處分應著為法及應衝改條制者申中書省樞密院審
奏傳宣或內降若須索及官司奏請雖得旨而元無條

貫者並隨事申中書省樞密院覆奏取旨

新本削去此段當考

入內省申準赦內臣並與改轉李友詢石璘宋用臣馮仲禮閻守勲馮景梁安禮盧守正史環老弼劉友益黃經臣雷易並令轉出并李穀亦與轉出勾當御藥院劉惟簡與轉出以勾當內東門司閻安代之馮宗道勾當御藥院老宗元梁惟簡並勾當內東門司梁惟簡兼太皇太后殿祗候老宗元兼皇帝殿祗候

此密記四月八日事

壬申安仁保佑夫人張氏進封秦國晉國安仁保佑夫

人

甲戌德妃苗氏進位貴妃德妃周氏賢妃邢氏進位淑妃仁宗第十二女進封魏國大長公主為楚國大長公主仁宗第十女韓國大長公主為周國大長公主英宗第三女衛國長公主為冀國大長公主大行皇帝第三女封淑國公主為溫國長公主大行皇帝第四女為康國長公主第八女為忻國長公主第九女為嘉國長公主第十女為德國長公主以大行在殯罷冊禮止賜告

靜海軍節度使特進檢校太尉安南都護交趾郡王李
乾德加同中書門下平章事西蕃邈川首領河西軍節
度使檢校太傅武威郡王董戩改檢校太尉 詔曰恭
以先皇帝臨御四海十有九年夙夜勵精建立政事所
以惠澤天下垂之後世比聞有司奉行法令往往失當
或過為煩擾違戾元降詔旨或苟且文具不能布宣實
惠或妄意窺測怠於舉職將恐朝廷成法因以隳弛其
申諭中外自今已來協心循理奉承詔令以稱先帝更

易法度惠安元元之心敢有弗欽必底厥罪仍仰御史

臺察訪彈劾以聞

舊錄云時蔡確等應法寢改廢故降是詔然卒弗能禁新錄辨曰蔡確知

有司奉行新法例皆失當過為煩擾實惠不孚則不能不更法也法少更則身必不安於位是詔誠確等有以啓之矣史官不推本神祖愛民之意而飾確之謀以欺後世今合刪改呂大防政目詔有司奉行先帝詔旨失當事以聞

尚書省言三省及在京官司官吏凡歲終

在八日

比較功過并上簿過犯自来雖遇常赦並通計行罰今該三月六日登極大赦常赦所不原者咸赦除之其今年三月五日已前過犯除以功比折外應理過者並合

除免從之 禮部言治平故事山陵掩皇堂畢宗正卿行虞祭之禮官制太廟舊儀悉隸太常寺將來虞祭乞改太常卿行事從之 錄故右侍禁王千男亮為三班奉職姪勝為借職以千死事故也

乙亥朝奉郎守太府少卿宋彭年言殿前馬步軍司管軍闕官乞依故事差八員仍逐司常留一二員宿衛詔管軍朝廷重事彭年妄有干預特罰銅三十斤 延福宮使入內都知利州觀察使張茂則為寧國軍留後入

內都知吏部郎中胡宗愈為右司郎中工部員外郎高
遵惠為右司員外郎左司郎中范子奇直龍圖閣河北
路轉運使右司員外郎范純粹直龍圖閣京東路轉運

使 詔以太皇太后七月十六日生辰為坤成節

趙子
崧中

外舊事云宣仁聖烈皇后垂簾坤成節內外命婦入賀
上壽畢內侍老宗元大呼于殿廡曰除宰執宗室命婦
依故事外高氏命婦盡出就宅賜宴即歸供帳甚盛沾
及奴僕歲以為常蓋太皇太后惡請託而遠之也可謂
公矣高世誕證之云宣仁既修北宅以奉親其母兩國
太夫人李氏入謝因請置潛火一鋪后曰但令公繪公
紀省事豈解失火李夫人不樂復曰曹家亦是聽政時
南宅創添潛火人后變色曰姐姐殊不思之甚也二姐

豈敢比孃孃孃於趙氏有大功不可引也因手扎戒
二高不得妄干請其家至今寶藏高世誕云此一殿當

別附

詔催作二王外第

政目十
二日事

廊延路經畧使言蕃

部伊實鄉道入西界殺副監軍等首級乞與近上班行

詔與下班殿侍

湖北都鈐轄轉運司言權知誠州西

京左藏庫副使兼閤門通事舍人周士隆招納溪峒有

勞詔遷一官令再任

丙子禮部言元豐二年故事三路緣邊臣寮祔廟畢許

開樂治平四年緣邊臣寮百日始開乞依元豐二年故

事從之

丁丑資政殿大學士銀青光祿大夫呂公著兼侍讀公

著時知揚州召用之遵先帝意也

新錄於此別書云先是神宗諭輔臣曰皇

子明年出閣當以呂公著為保傅至是召公著侍經筵遵先帝意也按神宗諭輔臣前已具書此不必重載今但存遵先帝意也一句新錄自為一書故不得不爾

資政殿學士大中大夫司

馬光知陳州朝奉郎祕書少監孫覺兼侍講奉議郎宗

正寺丞劉次莊為殿中侍御史奉職郎真定府路安撫

司勾當公事孫升為監察御史

按新舊錄孫升傳並云中丞劉摯引為監察御史

史此時摯初未入臺黃履實為中丞舊錄既誤新錄因之然則升必履所薦也當考元祐二年二月十四日履坐舉次莊自龍學降天制四月八日又落職梁燾奏議可考

朝奉郎劉摯宣德郎

張汝賢為吏部郎中朝奉郎集賢校理梁燾為工部郎中奉議郎黃庭堅為校書郎 詔守太師開府儀同三

司潞國公致仕文彥博不許辭免兩鎮節度使

六年十一月甲

寅已載彥博許免兼永興節度今復有此詔當考或是覃恩申命故也五月十二日許免

詔許樞

密院依舊制開便門與中書省相通赴都堂議事

舊錄云先帝設

官分職各有分守不可紊也時欲同惡相濟故有是詔新錄辨曰密院中書事均一體便門相通祖宗舊制也

與先帝設官分職各有分守理不相妨同惡相濟鄙陋無稽自先帝設官至有是詔二十四字並刪去密記十四日自來樞密院與三省議事並會於南廳欲依例開便門與中書省相通赴都堂議事如遇上馬仍依左右丞例同三省奉旨依御史中丞黃履言福建路鹽法惟邵武軍

汀州受數為重邵武縣近以鹽多民匱難於出糶遂以人戶產錢紐定賣鹽不循朝旨鄉鋪之法至於建寧光澤等縣其弊亦然汀劍建三州亦有抑勒乞差官體量監察御史安惇言福建轉運副使王子京擘畫官買臘茶歲三百萬斤訪聞抑認乞委官採訪遂詔昨先帝以

諸路監司責任不輕朝廷當加考覈其煩急掎克與曠弛不職者當有所懲去歲已詔脩立分遣郎官御史察舉之法可依先帝詔旨施行江南西路遣監察御史陳次升福建路遣監察御史黃降

新錄但書遣次升及降察舉詔削去黃履安惇

所言今依舊錄並書之五月十六日改差

詔殿前馬步軍司凡前後新招

揀禁軍兵士先令在營指教百日不及第二等再限兩月限滿又未及即於教場再教兩月候又限滿不入等人馬軍改充步軍步軍改充廂軍仍令樞密院召管軍

臣僚說論 左侍禁權融州王口寨監押杜臨左班殿

直權誠州渠陽縣尉杜震弟邁為三班借職先是臨震
乞以招安及戰功轉官減年回授邁官而朝廷委本路
轉運司審問乃知邁昭憲皇后親弟審進之後故有是
命

戊寅錄故贈文思副使韋定女夫左班殿直向達為右
侍禁將沂仇宗亮並為三班借職以定死事故也

庚辰知太原府呂惠卿遣兵入西界破六寨斬首六百

餘級

元祐元年六月八日劉摯黃巖叟蘓轍王覲皆有言責惠卿以四月十七日并十九日出兵此據言

章增入五月二日賞功呂惠卿家傳云初惠卿至河東管勾麟府路軍馬公事燕復屢乞以兵入界討蕩為倭往忽來之計使賊不得安居惠卿使諸將會議皆以為夏人數遭掩擊族帳遠徙而斥堠嚴警間諜莫知其詳淺攻無利深入可虞惠卿以為然遂令諸將分地弛守備務耕牧以疑賊計八年四月朝廷以國恤敵謀入寇詔惠卿出師先之惠卿諜知屯聚所在遣將邢佐臣折克行訾虎以蕃漢步騎二萬二千出左廂至聚星泊滿朗嘉伊克羅朗三角等處破賊六寨斬首六百餘級凡首領十三人獲銅印十四顆駱駝牛馬以萬計追奔數十里振旅而歸劉摯劾呂惠卿擅興兵西人復仇以五月犯寨疆臣戰沒士卒陷亡當檢詳追附今五月實錄不載西人復仇事王覲云供奉官王英以戰死兵士陷沒者六千餘人摯覲所云今附五月末王巖叟等元祐元

年六月二十日奏乃云惠卿以八年四月二十一日遣兵出界

辛巳奉議郎職方員外郎邢恕為右司員外郎蔡確初未知恕文彥博之歸洛陽也恕有詩送行神宗嘗對確稱焉且謂恕久在館下當遷確曰熙寧變法之初恕有異議不可用神宗不答確退朝即召恕告之恕尋遷著作佐郎元豐七年五月一日不半歲又遷職方員外郎七年十一月九日恕雅善司馬光呂公著確度光及公著必復用遂深交恕意欲因恕以結二人也然恕傾險乃更與確陰謀謂

確有定策功於是驟遷都司

此據邵伯溫邢恕傳然伯溫謂恕為都司薦劉摯等

於蔡確確不能用摯等既攻確并及恕恕怒遂以謀廢立事報摯等按恕與確畫策欲傾王珪蓋二月末間今遷都司蓋確藉其畫策耳不緣欲因恕結司馬光等也今刪取之

承議郎試中書舍

人王震為大行皇帝遺留北朝禮信使內殿承制騫育

副之詔太皇太后母魯國夫人李氏進封韓趙國太

夫人遣承議郎左司郎中滿中行充皇帝登寶位北朝

國信使左班殿直閤門祗候焦顏叔副之詔中行等到

遼國諭其館伴以大行皇帝遺制尊皇太后為太皇太

后同處分軍國事典禮並依章獻太后垂簾故事兩朝
合通信使令具此聞於北朝

壬午詔先帝昔降指揮諸軍月糧足給斗數分遣使臣
諸營檢察自今凡月糧務遵先降指揮令入內侍省
所遣官檢察 禮部言高魯王名正字並迴避有難迴
避者空點畫仍以黃紙覆之嫌名於禮不諱亦無迴避
故事詔可仍自今進呈并入奏文字雖嫌名亦覆之
癸未東染院使王殊為皇城使成州團練使六宅副使

王殖為六宅使利州團練使殊殖以故燕國大長公主

子也

殊殖已見林希野史云元豐七年元日王師約之長子莊宅使殖十五歲裹頭入禁中見自真宗時

李端懿兄弟以長公主子入見仁宗英宗兩朝無帝甥英宗三主下降師約子首得進見戚里皆榮之師約次子又許尚淑壽公主朱妃出也按七年春不見王殖入見事八年夏殖尚為六宅副使則希昝稱莊宅使必誤也附注

當考

左司郎中滿中行言內外官司供申朝省旬

月季歲帳狀其間多有久例名件參錯所承管司往往

別無照用乞行廢罷從之

此用崇寧四年九月六日報狀增入

甲申奉議郎權河北路轉運判官張適通判萊州

張適必有

言者故責當考元豐七年八月三日推行適所上河朔鹽利今責官必坐此

詔水部員外

郎王諤特罰銅三十斤諤言京東兩路保馬乞令有司奉行朝廷元立條限及乞增置太學春秋博士緣保馬年限係朝廷先已處分并春秋博士亦非本職所當論列故罰之 環慶路經畧司言蕃官員等討西賊獲

宥州正監軍偽駙馬葉結威明嘉勒詔具功狀以聞葉結

威明嘉勒仍押赴闕

五月二十四日丙辰當考此月二十日乙酉趙高賞功趙高傳元豐八

年四月夏賊葉結威明嘉勒宿重兵于賀蘭原時出盜邊高遣將李照用蕃官歸仁各領兵三千左右分擊與耿

端彥兵四千趨賀蘭原戒端彥曰賀蘭險要過嶺則沙磧也使賊入平夏無繇破之復選蕃官二悉威明嘉勒屬族各與輕兵五百使從間道出賊砦後邀歸路是月與賊戰和爾平賊敗果趨平夏千兵伏發賊駭潰斬馘千生擒威明嘉勒斬首領六獲戰馬七百牛羊老幼三萬五月遷龍圖閣直學士朝奉大夫復帥延安傅蓋全因范百祿所作

神道碑

刑部言叙用人連遇三赦合叙三官惟遇

第一赦人多赦前已歷歲月及赦文內稱特理三朞而文武臣僚叙法乃有一朞二朞一叙者欲應赦前合叙朞限已滿之人偶未投狀該前項第一赦者先具朞限次具赦恩各與叙用若該第一次赦恩所叙朞限未滿

即以赦恩叙訖仍留實歷過年月後叙收使并文武臣僚合一朞二朞一叙者赦文雖稱與理三朞止合每赦與叙一官即不在收留赦文內剩朞之限從之 司馬

光上疏曰臣聞本固則末茂源濁則流渾昔仁宗皇帝擢臣知諫院臣初上殿即言人君之德三曰仁曰明曰武致治之道三曰任官曰信賞曰必罰英宗皇帝時臣曾進歷年圖其後序曰人君之道一其德有三其志亦猶所以事仁宗也 大行皇帝新即位擢臣為御史中丞

臣初上殿言人君修身治國之要其志亦猶所以事英宗也今上天降災大行皇帝奄棄天下皇帝陛下新承大統太皇太后同聽萬幾不知臣愚猥蒙訪落且愧且懼無以塞責謹復以人君修身治國之要為獻其志亦猶所以事大行皇帝也所以然者臣歷觀古今之行事竭盡平生思慮質諸聖賢之格言治亂安危存亡之道舉在於是不可移易是以區區首為累朝言之不知臣者以臣為進迂闊陳熟之語知臣者以臣為識天下之本源也夫治亂安危

存亡之本源皆在人君之心仁明武所出於內者也用人
賞功罰罪所施於外者也出於內者雖有厚有薄有多有
寡稟之自天然好學則知所宜從力行則光美日新矣施
於外者施之當則保其治保其安保其存不當則至於亂
至於危至於亡行之由已者也所以能當在於至明所以
能明在於至公是以明君善用人者博訪遠舉拔其殊尤
德行高人謂之賢知勇出衆謂之能賢不必能能不必賢
各隨所長授以位任有功則賞有罪則罰其人苟賢能雖

雖必用其人苟庸愚雖親必棄賞必有所勸罰必有所懲
賞不以喜罰不以怒賞不厚於所愛罰不重於所憎必與
一國之人同其好惡是以古者爵人於朝與士共之刑人
於市與衆棄之如此安有不當者乎臣故曰所以能當在
於至明所以能明在於至公也昔齊桓公置射鉤而使管
仲相漢高祖知人善任使苟為不才雖見喜亦棄之苟
才矣雖負販酒徒已將戍卒亦用之此所以能奮布衣
取天下也館陶公主為子求郎明帝不許而賜錢千萬

郎賤官也猶惜之況其貴者乎故永平之治至今稱之
宋高祖事蕭太后甚孝太后欲以子道憐為揚州刺史
高祖以其貪愚不許故功業之高冠於南朝唐太宗殺
建成元吉而用其官屬魏鄭公王珪等與房杜無異卒
得其效宣宗事鄭太后甚謹問舅鄭光以政事不能對
罷其方鎮故時人稱美謂之小太宗此用人之公明者
也韓昭侯惜敝袴不以賜左右之無功者漢高祖深怨
雍齒而不忘其功魏太祖勲勞宜賞不吝千金無功望

施分毫不與唐宣宗重惜服章故當時得緋紫者以為榮此賞功之公明者也豎牛殺孟丙仲任立叔孫昭子昭子數其罪而殺之孔子善其不勞丁公脫漢高祖於阬高祖以為不忠而斬之武帝妹隆慮公主且死屬其子昭平君昭平君殺人武帝流涕而誅之唐明皇弄臣王鉞掀捕盜官墜馬明皇杖殺之宣宗謂樂工汝惜羅程藝我惜高祖太宗法此罰罪之公明者也臣略舉此數者以為明驗其餘在陛下博覽載籍以考之知臣所

言不為謬妄臣一夫之愚不能周知天下之務近曾上

奏乞下詔書開言路伏望聖慈早賜施行并治平四年

五月三日上殿劄子具錄進呈乞陛下留神幸察

此疏以四

月二十一日上二

十一日甲申也

乙酉天章閣待制知慶州趙高為龍圖閣直學士知延

州龍神衛四廂都指揮使昌州刺史劉昌祚令赴闕供

職朝議大夫直集賢院知河中府范純仁為直龍圖閣

知慶州

高功具四月二十一日注
明年七月七日高又遷官

朝奉郎監曹州酒

稅吳安持權知滑州宰臣蔡確言安持向在京寺嘗奏
論臣弟碩事坐上書不實得罪先帝用臣奏免勒停與
近郡監當雖累經宥赦而差遣未嘗移改緣安持吏幹
實長乞委之繁難俾得自效故有是命

王巖叟云云政
目安持二十二

日知
滑州

淮南東路提舉常平司言皇帝登位乞依發運
轉運提點刑獄官例以本司錢進奉從之 詔故樞密

副都承旨張山甫任職歲久錄其子詠為右班殿直諭
為三班借職女夫陶器為太廟齋郎 樞密院言府界

三路保甲兩丁之家見教人小弱或久病及除當教人
外家止有病丁并第五等以下田不及二十畝者聽自
陳提舉司審驗與放免詔可

六月四日丙寅二十四日
丙戌七月六日戊戌十二

日甲辰二十二日
甲寅並合參考

監察御史安惇奏伏聞成都逐年

撥米三萬石賣與貧弱之人近來知府呂大防等却許
官戶舉人置歷請買因緣請託享此厚利顯屬僥倖伏
望委官覈實審如所聞乞賜施行詔令呂大防具析聞
奏

此據密疏大防政目在四月二十二日
今附本日不知大防分析云何當考

知成都府

呂大防奏準內臣張琳公文除十色縑絲來年織外所有錦縑絲鹿胎並依今樣織行已將未上機物帛依樣織造合行審取聖旨詔並權住織造

舊錄云詔知成都府呂大防所乞依

樣織造錦縑絲鹿胎並權罷新錄云詔成都府織造錦縑絲鹿胎並權罷從知府呂大防請也二錄所書不同

今從元祐密詔

丙戌晉州觀察使駙馬都尉王師約言燕國大長公主薨太常寺關本服齊衰杖舥給假三十日緣臣忝冒寵祿悉緣主故恐難循常詔舥服依太常議特給假一年

蕃官東頭供奉官高福進戰死錄其子文俊孫永德
永貴並為三班借職

欽定四庫全書

續資治通鑑長編卷三百五十五

宋 李燾 撰

哲宗

元豐八年四月丁亥太皇太后曾祖贈太師開府儀同
三司冀王瓊追封漢王曾祖母贈冀國太夫人李氏贈
漢國太夫人贈冀國太夫人李氏贈雍國太夫人祖贈
太師開府儀同三司越王繼勲追封豫王祖母贈越國

太夫人康氏贈豫國太夫人郭氏贈吳國太夫人王氏
贈冀國太夫人父贈太師開府儀同三司魯王遵甫追
封兗王母贈魯國太夫人曹氏贈兗國太夫人皇太后
曾祖故尚書左僕射兼門下侍郎平章事贈太師開府
儀同三司兗國公敏中追封文安郡王曾祖母贈兗國
太夫人梁氏贈唐國太夫人張氏贈荆國太夫人宋氏
贈楚國太夫人王氏贈越國太夫人祖故任駕部員外
郎贈太師開府儀同三司衛國公傅亮追封韓國公祖

母贈魏國夫人吳氏贈韓國太夫人父故任定國軍節
度觀察留後贈太師開府儀同三司河內郡王經追封
益王母贈魯國太夫人李氏贈秦國太夫人張氏贈吳
國太夫人 中書省言登極赦書并今月八日朝旨民
戶欠去年夏秋稅及元豐六年已前稅租積欠并緣納
錢物倚閣稅等乞並特除放從之 詔諸民戶欠元豐
七年已前常平免役息錢各特減放五分買撲場務佃
賃田宅空地出限當罰錢調春夫河防急夫開修京城

壕及興水利夫罰錢役人誤給工食錢亦並除放 又
詔遣廊延路第一副將李浦專捕陝西京西路軍賊王
冲仍令選募膽勇兵員三百人每五十人許不拘常
制抽差武勇使臣一名部押不以遠近襲逐每三日一
具捉殺次第急傳以聞其捕盜官及已差任青等並聽
浦指揮如有怯懦逗留畏避仰浦選使臣代之仍牒所
屬劾奏當議重行處斷李浦給中等支賜并所差使臣
並給驛券遞馬兵員給口券外兵級人給錢一千人員

人給錢二千日支食錢五十人員以次增給之其器甲

於所在選借

六月十七日獲冲

詔知邵州關杞遷一官以杞

招納芙蓉石驛浮城界溪等處人戶歸化及臨口等處
築塞鋪有勞故也又詔杞所保明乞推恩人係優等者
各與遷一官餘減年磨勘及支賜有差 詔誠州天村
大由所建寨堡各以地名為額從知誠州周士隆之請
也

戊子尚書省言諸處獲盜有已經殺人強姦及元犯強

盜貸命斷配之人再犯捕獲有司以事發涉疑例用知
人欲告或按問自首減免法且律文知人欲告及按問
欲舉自首之類減等斷遣者為其情非巨蠹有改過自
新之心故行寬貸今已上情理與餘犯不同難以一例
減等欲乞諸強盜已殺人并強姦或元犯強盜貸命若
持仗三人以上知人欲告按問欲舉而自首及因人首
告應減者並不在減等之例從之

舊錄云先是熙寧初
王安石引知人欲告

減等律無巨蠹不減之文與司馬光爭議久之其後卒
從安石議全貸者眾至是姦臣欺罔改焉新錄辨曰臣

下各以所見為朝廷議法耳非欺罔也自先是熙寧至
欺罔改焉五十字並刪去明年二月末范純仁奏當考
已丑三省樞密院言續討論垂簾故事儀注應合告謝
臣僚並垂簾日引依閣門見行儀令從之 雍王顥曹
王顥上表辭贊拜不名五日一朝見於內中如見大長
公主之儀詔不允

庚寅尚書省奏刑部言今年正月九日赦書叙法未復
舊官者滿三朞聽一叙即已得正官者每叙轉官如選
人到銓日及年限即更與叙用按選人常叙如未復舊

資湏一任回到吏部日及年限方許再叙今非次赦恩特理三朞欲不以到部為限並與併叙內見任人據所叙官資與寄理仍支所叙官俸從之 供備庫副使兼

閤門通事舍人文貽慶為奉議郎都官員外郎

貽慶彥博第二

子

司馬光上疏曰臣竊見先帝聰明睿智勵精求治

思用賢輔以致太平委而任之言行計從人莫能間雖周成王之任周公齊桓公之任管仲燕昭王之任樂毅蜀先主之任諸葛亮殆不能及斯不世出之英主曠千

載而難逢者也不幸所委之人於人情物理多不通曉
不足以仰副聖志又足已自是謂古今之人皆莫已如
不知擇祖宗之令典合天下之嘉謀以啟迪清衷佐佑
鴻業而多以已意輕改舊章謂之新法其人意所欲為
人主不能奪天下莫能移與之同者援引登青雲與之
異者擯斥沉溝壑專欲遂其狠心不顧國家大體人之
常情誰不愛富貴而畏刑禍於是搢紳士大夫望風承
流競獻策畫務為奇巧捨是取非興害除利名為愛民

其實病民名為益國其實傷國作青苗免役市易賒貸等法以聚斂相尚以苛刻相驅生此厲階迄今為梗又有邊鄙之臣行險徼幸大言面欺輕動干戈妄擾蠻夷夫兵者國之大事廢興存亡於是乎在而其人苟營一身之官賞不顧百姓之死亡國家之利病輕慮淺謀發於造次御軍無法僅同兒戲深入敵境坐守孤城糧運既竭狼狽奔潰築塞極邊功猶未畢輕敵不備闔城塗地使兵夫數十萬暴骸於曠野資仗巨億棄捐於異域

又有生事之臣欲乘時干進建議置保甲戶馬保馬以資武備變茶鹽鉄冶等法增家業侵街商稅等錢以供軍須遂使九土之民失業困窮如在湯火此皆羣臣躁於進取惑誤先帝使利歸於身怨歸於上非先帝之本志也臣荷先帝大恩常思報效鄉在朝廷之時屢言新法非便觸忤權貴冒犯衆怒爭辨非一先帝憐其孤忠不以為罪仍蒙寵擢寘之樞廷臣以所言未行力辭不受臣非惡富貴而好貧賤正欲感寤先帝知臣為國不為身

庶幾采納狂瞽使百姓獲安基局永固而已既又自乞
冗官退伏閭里雖身處於外區區之心晨夕寤寐何嘗
不在先帝之左右所以不敢自赴闕廷如此之久者亦
猶辭樞廷之志也熙寧七年歷時不雨先帝遇災而懼
深自刻責誕布詔書廣開言路臣當是時不勝踴躍極
有開陳而建議之臣知所立之法不合衆心天下之人
必盡指其非恐先帝覺寤而已受誤國之罪伏欺罔之
刑乃勸先帝繼下詔書言新法已行必不可動臣之所

言正為新法若不可動臣尚何言自是閉口不敢復預
朝廷議論十有一年矣然每覩生民之愁怨憂社稷之
阡危於中夜之間一念及此未嘗不失聲拊心也葵藿
之志猶望先帝一賜召對訪以外事得吐心極言退就
斧鉞死無所恨不意上天降禍先帝升遐臣之寸誠無
由披露鬱抑憤懣自謂終天及奔喪至京乃蒙太皇太
后陛下特降中使訪以得失是臣積年之志一朝獲伸
感激悲涕不知所從顧天下事務至多臣思慮未熟不

敢輕有條對但乞下詔使吏民皆得實封上言庶幾民間疾苦無不聞達既而間有旨罷修城役夫撤訶邏之卒止御前造作京城之人已自歡躍及臣歸西京之後繼聞斥退近習之無狀者戒飭有司奉法失當過為煩擾者罷物貨等場及民所養戶馬又寬保馬年限四方之人無不鼓舞聖德傳布一日千里頌嘆之聲如出口溢於四表乃知太皇太后陛下深居禁闥皇帝陛下雖富於春秋天下之事靡不周知民間衆情久在聖度

四海羣生可謂幸甚凡臣所欲言陛下略已行之臣稽慢之罪實負萬死夫為政在順民心苟民之所欲者與之所惡者去之如決水於高原之上以注川谷無不行者苟或不然如逆阪走丸雖竭力以進之其復走而下可必也今新法之弊天下之人無貴賤愚智皆知之是以陛下微有所改而遠近皆相賀也然尚有病民傷國有害無益者如保甲免役錢將官三事皆當今之急務釐革所宜先者臣今別具狀奏聞伏願決自聖志早賜

施行議者必曰孔子稱孟莊子之孝其他可能也其不改父之臣與父之政是難能也又曰三年無改於父之道可謂孝矣彼謂無害於民無損於國者不必以已意遽改之耳必若病民傷國豈可坐視而不改哉易曰幹父之蠱有孚考無咎象曰幹父之蠱意承考也蠱者事有蠱敝而治之也幹父之蠱迹似相違意則在於承繼其業成父之美也又曰裕父之蠱往見吝象曰裕父之蠱往未得也裕者益饒之名也若不忍違異蓋父之過

往而不反未為得宜也昔漢文帝除肉刑斬右趾者棄市笞五百者多死景帝元年即改之笞者始得全武帝作鹽鐵權酤均輸等法天下困弊盜賊羣起昭帝用賢良文學之議而罷之後世稱明唐代宗縱宦官公求賂遺置客省拘滯四方之人德宗立未三月悉禁止罷遣之時人望致太平德宗晚年有宮市五坊小兒暴橫為民患鹽鐵月進羨餘順宗即位皆罷之中外大悅是皆改父之政而當者人誰非之哉况先帝之志本欲求治

而羣下干進者競以私意紛更祖宗舊法致天下籍籍如此皆羣臣之罪非先帝之過也為今之計莫若擇新法之便民益國者存之病民傷國者悉去之使天下曉然知朝廷子愛黎庶之志吏之苛刻者必變而為忠厚民之離怨者必變而為親譽德業光榮福祚無窮豈不盛哉夫天子之孝在於得萬國之歡心以事其親儻措置如此歡心孰大焉事親孰備焉不然今幅員之內所在嗷嗷有倒垂之急延頸傾耳以俟改法庶得蘇息若

朝廷不以為意日復一日萬一遇千里之蝗旱公私匱竭無以相救失業之民蜂起為盜安知無奸雄乘之而動則國家有累卵之危申屠剛曰未至豫言固常為虛及其已至又無所及朝廷當此之際解兆民倒垂之急救國家累卵之危豈暇必俟三年然後改之哉況今軍國之事太皇太后陛下權同行處分是乃母改子之政非子改父之道也何憚而不為哉惟聖明裁察其乞罷保甲曰臣竊以兵出民間雖云古法然古者八百家纔

出甲士三人步卒七十二人閑民甚多三時務農一時講武不妨稼穡自上世相承習以為常民不驚擾自兩司馬以上皆選賢士大夫為之無侵漁之患故卒乘輯睦動則有功今籍鄉村之民二丁取一以為保甲皆授以弓弩教之以戰陳是農民半為兵也三四年來又令河北河東陝西置都教場無間四時每五日一教特置使者比監司專切提舉州縣不得關預每一丁教閱一丁供送雖云五日而保正長以泥墁除草為名日聚教

場得賂則縱之不則留之是三路耕耘收穫稼穡之業
幾盡廢也自唐開元以來民兵法壞戍守戰攻盡募長
征兵士民間何嘗習兵夫兵者凶器聖人不得已而用
之國家承平百有餘年四夷順服戴白之老不識兵革
一旦猷畝之人忽皆戎服執兵奔馳滿野見者孰不驚
駭耆舊歎息以為不祥事既草創調發無法比戶騷擾
不遺一家又巡檢指使按行鄉村往來如織保正保長
依倚弄權坐索供給多責賂遺少不副意妄加鞭撻蠶

食行伍不知紀極中下之民罄家所有侵肌削骨無以供億愁苦困弊靡所投訴流移四方襁屬盈路又朝廷時遣使者徧行按閱所至犒設賞賚靡費金帛以巨萬計此皆鞭撻平民銖兩丈尺而歛之一旦用之如糞土而鄉村之民但苦勞役不感恩澤臣不知設保甲於農民之勞既如彼國家之費又如此終將何所用哉若使之捕盜賊衛鄉里則何必如此之多若使之戍邊境征敵國則彼國之民以騎射為業以攻戰為俗自幼及長

更無他務中國之民生長太平服田力穡雖復授以兵械教之擊刺在教場之中坐作進退有似嚴整必若使之與敵人相遇頓然鼓之鳴鏑始交其奔北潰敗可以前料決無疑也是猶驅羣羊而戰豺狼也當是時豈不誤國事乎又悉罷三路巡檢下兵士及諸縣弓手皆易以保甲令主簿兼縣尉但主城市以裏其鄉村盜賊悉委巡檢而巡檢兼掌巡按保甲教閱朝夕奔走猶恐不辦何暇逐捕盜賊哉又保甲中往往有自為盜者亦有

乘保馬行劫者然則設保甲保馬原為除盜乃更資盜也書曰民惟邦本本固邦寧又曰可畏非民夫川涸魚逝林燔鳥飛民喪其生業無以自存赴訴不受失其所依安得不去而為盜哉自教閱保甲以來河東陝西京西盜賊已多至敢白晝公行入縣鎮殺官吏官軍追討經歷歲月終不能制况三路未至大饑而盜賊已昌熾如此萬一遇數千里之蝗旱而失業飢寒武藝成就之人所在蜂起以應之其為國家之患可勝言哉此非小事

不可以忽夫奪其衣食使無以為生是驅民為盜也使
比屋習戰勸以官賞是教民為盜也又撤去捕盜之人
是縱民為盜也謀國如此果為利乎害乎且嚮者干進
之士說先帝以征伐四夷開邊拓土之策故立保甲戶
馬保馬等法近者登極赦書節文云應緣邊州軍仰逐
處長吏并巡檢使臣鈐轄兵士及邊上人戶不得侵擾
外界務要靜守疆場勿令騷擾此蓋聖意欲惠綏殊方
休息中國遠近之人孰不歸戴然則保甲戶馬復何所

用哉今雖罷戶馬寬保馬而保甲猶存者蓋未有以其利害之詳奏聞者也臣愚以為宜悉罷保甲使歸農召提舉官還朝量逐縣戶口每五十戶置弓手一人略依緣邊弓箭手法許蔭本戶田二頃悉免其稅役除出賊地分嚴加科罰及令出賞錢外其賊發地分更不立三限科校但令捕賊賞給若獲賊數多及能獲強惡賊人者各隨功大小遷補職級或補班行務在優假弓手使人勸募然後募本縣鄉村戶有勇力武藝者投充計即今

保甲中有勇力武藝者必多願應募若一人闕額有二人以上爭投者即委本縣令尉選武藝高强者充或武藝衰退者許他人指名與之比較若武藝勝於舊者即令充替其被替者更不得蔭田如此則不必教閱武藝自然精熟一縣之中其壯勇者既為弓手其羸弱者雖使為盜亦不能為患仍委本州及提點刑獄常按察令佐有取舍不公者嚴行典憲若召募不足即且於鄉村戶上依舊條權差候有投名者即令充替其餘巡檢兵士縣尉

弓手耆長壯丁逐捕盜賊並乞依祖宗舊法又乞罷免役曰臣竊以百姓出力以供在上之役蓋自古及今未之或改熙寧中執政者以為百姓惟苦差役破產不憚增稅乃請據家貲高下各令出錢僱人充役按因差役破產惟鄉戶衙前有之自餘散從承符弓手手力耆戶長壯丁未聞破產者也其鄉戶衙前所以破產者蓋由山野愚戇之人不能幹事使之主管官物或因水火損敗或為上下侵欺是致欠折脩償不足有破產者至於

長名衙前久在公庭勾當精熟每經重難差遣積累分
數別得優輕場務酬獎往往致富何破產之有夫差役
出於民錢亦出於民今使民出錢雇役何異割鼻飼口
朝三暮四於民何所利又嚮者役人皆上等戶為之其
下等單丁女戶及品官僧道本來無役今更使之一槩
輸錢則是賦歛愈重非所以寬之也故自行免役法以
來富室差得自寬而貧者困窮日甚殆非所以抑兼并
哀惻獨均賦役也又監司守令之不仁者於雇役人之

外多取羨餘或一縣至數萬貫以冀恩賞規進取不顧
為民世世之患又國家舊制所以必差青苗戶充役人
者為其有莊田家屬有罪難以逃亡故頗自重惜今雇
浮浪之人充役常日恣為不法一旦事發單身竄匿何
處州縣不可投名又農家所有不過穀帛與力自古賦
役無出三者自行新法以來青苗免役錢及賦歛多責
見錢錢非私家所鑄要湏貿易外求豐歲穀賤已自傷
農況迫於期限不得半價盡糶所收未能充數家之餓

糧不暇更留若值凶年則又無穀可糶人人賣田無所
可售遂至殺牛賣肉伐桑鬻薪來年生計不敢復議此
農民所以重困也又錢者流通之物故謂之泉布比年
以來物價愈賤而閭閻益困所以然者錢皆聚於官中
民間乏錢貨重物輕設有人鬻薪糴米米價雖賤薪價
亦賤故也臣愚以為宜悉罷免役錢其州縣諸色役人
並依舊制委本縣令佐揭簿定差替見雇役人其衙前
先召募人投充長名召募不足然後差鄉村人戶每經

歷重難差遣依舊以優輕場務充酬獎所有見在免役錢撥充州縣常平本錢以戶口為率存三年之蓄有餘則歸轉運司凡免役之法縱富强應役之人征貧弱不役之力利於富者不利於貧者及今耳目相接猶可復舊若更年深富者安之民不可復差役矣又乞罷將官曰臣伏以州縣者百姓之根本長吏者州縣之根本根本危則枝葉何以得安故自古以來凡置州郡必嚴其武備設長吏必盛其侍衛非以重其權驕其人也乃所

以安百姓衛朝廷也秦懲周室幹弱枝強之弊既滅六國以為天下不復用兵雖分三十六郡置郡守更以御史監之隲名城銷兵器束以苛法舉動施為皆不得自專是以陳勝吳廣以匹夫奮臂大呼郡縣莫能制多殺長吏以應之雖由其殘虐取亡亦守令無權無兵之所致也晉武帝平吳亦以為天下既壹兵無所用悉去州郡兵陶璜山濤皆言州郡武備不可廢帝不聽及永寧以後盜賊羣起州郡無備不能擒制天下遂大亂夫兵

者所以威不軌而昭文德誰能去兵州縣無虞則國家安矣州縣不守則國家危矣臣竊見國朝以來置總管鈐轄都監押爲將帥之官凡州縣有兵馬者其長吏未嘗不兼同管轄蓋知州即一州之將知縣即一縣之將故也先帝欲征伐四夷患諸州兵官不精勤訓練士卒懈弛於是建議者請分河北陝西河東京東京西等路諸軍若干人爲一將別置將官使之專切訓練其逐州總管以下及知州知縣皆不得關預及有差使量留

羸弱下軍及剝員以充本州官白直及諸般差使其餘
禁軍皆制在將官專事教閱臣愚以為職事修舉在於
擇人不在設官苟不得其人雖將官亦何所為況今之
將官即向之為總管等者也豈為總管等則不能舉職
為將官乃能舉職乎此徒變易其名無益事實非惟無
益兼復有害凡設官分職當上下相維如身之使臂臂
之使指紀綱乃立今於州縣之吏及總管等而於所部
士卒有不相統攝不得差使殆如路人者至於倉庫守

宿街市巡邏亦皆乏人雖於條許差將下兵士而州縣
不得直差須牒將官將官往往占護不肯差撥萬一有
非常之變州縣長吏何以號令其衆制禦姦宄哉又頃
歲以來自轉運司知州以下白直及迎送之人日朘月
減出入導從本為蕭條供承荷擔有所不給觀望削弱
無以威服吏民臣略舉目覩一事以證其餘西京城郭
周數十里卑薄頽闕犬豕可踰又瀍洛二水交貫其中
每夜諸門扃鑰雖嚴而灘流之際人皆可以平行往來

其屬水南北巡檢下所管兵士除出軍外餘數不多通判以下諸官白直來往防送倉庫守宿街市巡邏盡出其間向者先帝違豫勅西京留守親詣嵩山起建道場其將下禁軍充白直者於條皆不得出城經宿所留者剩員七八人而已西京天子別都也其守禦不固如此留守前宰相重官也其侍衛單寡如此況僻小州縣其守禦之備侍衛之衆可知矣萬一有凶狡之賊驅烏合之衆突入城邑或戕賊長吏以焚燒廬舍殺掠吏民將

何以制之哉此則天下太平之久習俗淳厚羣心安固賊不測虛實膽智怯弱故未敢為之耳豈可忽略謂之必無而不為之備哉今獨緣邊州軍城隍完固士卒衆多可以守禦自餘腹內州縣既無深溝高城又乏士卒羣盜猝至何以責其竭節守義不棄城竄匿或以酒食迎賊以甲兵獻賊歛民財以賂賊者乎羣盜尚爾况敵人傾國大舉長驅而來者哉易曰君子安不亡危存不忘亡治不忘亂兵法曰不恃敵之不我犯恃我之不可

犯國家豈可恃即日平寧晏然高枕不以為慮謂其必不敢來乎臣愚以為河北陝西河東京西等路腹內州縣宜以漸候豐年農閒之際委提點刑獄與本處長吏相度各修築所治之城州城稍高縣城次之不必廣大所以然者高則難踰小則易守故也其緣邊屯駐兵士遇春夏無事之際委經略安撫使與轉運使公共商議量減放歸住營州軍或於內地就糧勿聽怯懦將帥多有虛占以自守衛其腹內州軍量其大小緊慢大藩常

留千餘人小州亦留數百人不得差發往別州軍見兵
不足即時招添悉罷將官其逐州縣禁軍並委長吏與
總管等同共提舉教閱及諸處差使其有不能精勤致
士卒懈弛者委提點刑獄常切按察聞奏嚴行責降仍
令逐州各選有勇力武藝之人充弓手以守衛城邑討
捕盜賊其州縣吏所給白直迎送之人皆如嘉祐編勅
以前之數如此力可以守然後遇寇盜之至責其棄城
等罪而誅之彼亦甘心矣

孫升君孚談圃云溫公大更
法令傳欽之蘇子瞻密言宜

慮後患溫公起立拱手仰視厲聲曰天若祚宋必無此事二人語塞而去方其病也猶肩舁見呂申公議改都省臨終床簀蕭然惟枕屏有役書一卷按天若祚宋必無此事邵伯溫亦載此語但不載語誰今附元祐元年九月一日溫公卒時因光以母改子并附注於此

是月承事郎司馬康為祕

書省正字以康與修資治通鑑故也

此據康所授正字告舍人錢勰行詞

曰名臣之子涵濡義訓細書來上豫有勤勩擢陞書省益思淬礪范祖禹銘康墓云以韓絳薦擢正字元年五月二日遷校書朝奉郎新知淄州趙子幾提舉崇福宮言者

論子幾風疾昏耄不可復授以郡故也

密疏四月事

監察

御史安惇奏訪聞荆湖南北兩路採買修京城木植內

侍高品甘承立於逐路製造上供生活以和雇為名強役工匠非法殘害死者甚衆加以藉勢營私為害不一

方朝廷以忠厚之政子養萬民而承立小臣敢肆貪暴公議不容伏望聖慈委官審察如有實乞賜施行詔令

荆湖北路轉運司體量詣實聞奏

密疏四月事今附月末六月二十四日押

承立赴胡
北取勘

欽定四庫全書

史部

續資治通鑑長編卷三百五十六

詳校官檢討臣劉錫五

刑部郎中臣許兆椿覆勘

纂修官編修臣閔思誠

謄錄監生臣黃維

欽定四庫全書

續資治通鑑長編卷三百五十六

宋 李燾 撰

哲宗

元豐八年五月癸巳朔中大夫寶文閣待制錢暄卒

甲午詔太皇太后母韓國太夫人凡給賜倍常儀 皇

城使榮州團練使知府州兼河東第十二將折克行言

率兵入西界夜戰翌日克捷崇儀副使權管勾麟府路

軍馬公事邢佐臣言第一將訾虎率兵入西界聚星泊
滿朗戰勝獲首四百級偽鈐轄一人詔有功當賞者經
略司書空名遷官宣劄行賞自朝廷推恩即具功狀以
聞四月十七日出兵昭宣使昌州刺史入內押班梁從吉代
宋用臣提舉皇城

乙未禮部言貢院以合格進士鄭奕江嶼劉正夫入章
犯高兗王諱駁放丙申太皇太后曰此舉人未通知特
與收錄蔡確曰法當黜以事初過誤恕之足彰盛德乃

聽依例附榜末

正夫衛州人

詔曰蓋聞為治之要納諫為

先朕思聞讜言虛已以聽凡內外之臣有能以正論啓
沃者豈特受之而已固且不愛高爵厚祿以獎其忠設
其言不當于理不切于事雖拂心逆耳亦將欣然容之
無所拒也乃若陰有所懷犯非其分或扇搖機事之重
或迎合已行之令上則觀望朝廷之意以徼倖希進下
則銜惑流俗之情以干取虛譽審出於此而不懲艾必
能亂俗害治然則黜罰之行是亦不得已也顧以即政

之初恐羣臣未能遍曉凡列位之士宜悉此心務自竭盡朝政闕失當悉獻所聞以輔不逮宜令御史臺出榜

朝堂

舊錄云上新即位姦人乘隙誣謗宰臣蔡確患之請降是詔然其後上書詆訕無復忌憚臣等辨曰哲

宗新即位司馬光上言近年以來風俗頹弊士大夫以偷合苟容為智以危言正論為狂下情蔽而不上通上澤壅而不下達請明下詔書廣開言路從之時用事之臣方持兩端而草詔者希望風旨名曰求言而寔設六條以拒之會光入覲上以詔書示之光上疏言詔書求諫而逆以六事防之未幾果別下詔今實書其事自上新即位至無復忌憚

三十一字並去之

詔新知陳州資政殿學士中大

夫司馬光過闕令入見先是光又上疏乞開言路曰臣

昨在京師伏蒙太皇太后不以臣愚疎無取遣使訪以得失豈惟微臣有千載一遇之幸中外聞之踴躍相慶以為言路將開下情得以上通太平之期指日可待也當是時臣未暇備論天下之事先陳所急於三月三十日上言以近歲風俗頽弊士大夫以偷合苟容為智以危言正論為狂故閭閻愁苦而上不得知明主憂勤而下無所訴公私兩困盜賊已繁宜下詔書不以有官無官之人有知朝廷闕失及民間疾苦者並許進實封狀

顯其人狂愚鄙陋者報聞罷去亦不加罪又於四月二十一日復上言皇帝陛下初即政於用人賞罰尤不可不當夫諫諍之臣人主之耳目也不可一日無之說命曰若跣弗視地厥足用傷設有人閉目而塞耳跣足而疾趨前遇險阻能無傷乎賈山有言人主之威非特雷霆也勢重非特萬鈞也開道而求諫和顏色而受之用其言而顯其身士猶恐懼而不敢自進况震之以威壓

之以重乎頃者王安石秉政欲蔽先帝聰明專威福行私意由是深疾諫者過於仇讎嚴禁誹謗甚於盜賊是以天下之人以言為諱百姓愁苦無聊靡所控告致怨謗之語上及先帝臣常痛心泣血思救其失是故首乞下詔開言路以通下情臣謂羣臣苟有肯進言者陛下必加褒擢以勸來者此乃古人市駿骨捐怒蛙之意也召誥曰王乃初服嗚呼若生子罔不在厥初生自貽哲命今皇帝陛下新即位太皇太后陛下初垂簾天下之

人莫不屬目傾耳臣自到西京以來朝夕伏聽朝廷惟新之政以為必務明四目達四聰以發天下積年憤鬱之志今開言路之詔既不聞頒於四方而太府少卿宋彭年言在京不可不並置三衙管軍臣僚水部員外郎王謬乞令依保馬元立條限均定逐年合買之數又乞令太學增置春秋博士使諸生肄業朝廷以非其本職而言各罰銅三十斤臣忽聞之悵然失圖憤邑無已臣非私於二人直於朝廷惜治體耳夫阿意箝口容身竊祿此

小臣之利也威福在己人莫敢言此大臣之利也然民怨於下而不聞國家貼危而不知於陛下有何利哉彼宋彭年王諤臣素不識不知其人為賢為不肖但惜陛下臨政之初而二臣首以言事獲罪臣恐中外聞之忠臣解體直士挫氣欲仕者歛冠藏之欲諫者咋舌相戒則上之聰明猶有所不昭下之情偽猶有所不達太平之功尚未可期也宋彭年所言雖不識事體但當寢而不行亦不宜加罪至如孔子作春秋為萬世法王安石

秉政輒黜之使不得與諸經並列於學官學者毋得習
以為業王諤所言未至不當乃以越職為罪古者置諫
鼓設謗木詢於芻蕘未聞有位於朝而以言事為越職
者也若當職之人既不肯言不當職之人又不得言則
以四海之廣兆民之衆其政治利病天子深居九重何
由得聞之哉昨日進奏院遞到告身差臣知陳州然則
臣自今於一州之外言及他事亦為越職何敢言矣今二
臣之罰既不可追伏望陛下如臣前奏下詔不以有官

無官當職之人皆得進言擇其可取者微加旌賞使天下之人知朝廷樂聞善言不惡論事無可取者寢而勿問庶幾願納忠之人猶肯源源而來也臣秉賦愚戇文學政事皆出人下惟不識忌諱不阿權貴遇事妄言無所顧避以此苟知於累朝見稱於衆人若亦不得言則無所復用於聖世矣上孤太皇太后陛下下問之意下負微臣平生願忠之心內自痛悼死不瞑目臣久忝便安今朝廷授以名藩義不敢辭見牒本州索遠接公人

起發赴任次到官之日但勉竭疲驚恪勤本職苟力所

不逮伏須罪戾而已於是令光過闕入見

光此疏不得實日因令光

入見故附載元祐密疏以為元豐八年四月二十九日奏此

贈皇太妃曾祖任百

祥祖士清父廷和太子太保太傅太師繼父故供備副

使朱士安開州刺史

詔自今門下中書外省尚書省

左右司樞密院承旨司遇大忌及早出並隨執政官內

有兼局者自依別條

詔罷歲運糧一百萬石赴西京

先是導洛通汴舟楫可入洛詔運東南粟以實洛下至

是戶部奏罷之

呂大防政目云宋用臣奏先準旨運糧百萬石赴西京候一年取旨詔罷運

戶部侍郎李定奏先奉旨令臣取索都提舉汴河堤岸司所管事件聞奏又奉旨專切提舉京城所管課利事件令臣一就取索今具到提舉汴河堤岸司專切提舉京城所管課利事件詔汴河堤岸及房廊水磨茶場京東西沿汴船渡京岸朝陵船廣濟船渡京城諸處房廊四壁花果水池冰雪窖菜園並依舊萬木場天漢橋及四壁果子京城豬羊圈東西麪市牛圈塚麻場肉行西塌場各

廢罷令賈種民等依罷物貨場已得指揮堆垛般運東南及西河客人物貨亦廢罷其見管官吏人等并京東西牧力勝殘並仰賈種民等一就相度措置聞奏洛口兩岸灘地令提舉京西北路常平張綬相度措置奏聞其依舊去處已前并向去及廢罷窠名所收課利並於內藏庫送納別作帳樁管以備朝廷支用

此據密疏增入四月八日辛未初令

李定綬言洛口兩岸灘地除係官者量減二分租錢外

餘依舊輸稅從之

此據舊錄增入密疏無之舊錄云詔都提舉汴河堤岸司及京城所管課

利場地並罷洛兩岸灘地令提舉京西北路常平張綾措置以聞綾言云云從之今別修如上政目云罷萬木場果子市豬羊園堞麻場麪市肉行西塌場又七月十八日可考

丙申上批太皇太后母韓越國太夫人李氏舊請新添通計逐月料錢一百五十貫文春冬衣各一百疋冬衣綿三百兩聖節粧粉錢一百貫文夏衣大物七十疋冬節雜劇錢一百貫文南郊回賜生白絹二百疋銀二百

兩自今並增一倍

御集五月四日御批

監察御史黃降為殿中

侍御史

此據政目

中丞黃履言降行誼端方文學該瞻乞就

遷言職故也

此據元祐密疏

丁酉以十二月八日為興龍節上實七日生避僖祖忌故改焉禮部言按太廟七世八室國朝已有定制請奉大行皇帝神主於太廟第八室翼祖皇帝為祧主廟當遷請依禮制奉翼祖簡恭睿德皇帝簡穆皇后劉氏神主藏於西夾室居順祖皇帝惠明皇后遷主後室之次仍令待制以上及祕書省長貳參議詔恭依

戊戌詔責授汝州團練副使本州安置蘓軾復朝奉郎

知登州

自黃移汝在七年正月二十一日

降授左衛將軍西京安置

郭達復左屯衛大將軍致仕

達安置在熙寧十年七月

右監門衛

將軍潁州安置王銑免安置許在京居住

郢州團練

副使高遵裕復右屯衛將軍管勾西京中嶽廟任便居

住

遵裕以五年正月十八日責郢州團練副使本州安置本傳云久之許從便居當即此時也靖康初諸王

府贊讀江端友上書其畧云初元豐中高遵裕大敗於靈武責散官安置未幾神宗崩哲宗嗣位宰相蔡確以高遵裕者宣仁族叔也即建請牽復以悅宣仁之意而不知宣仁之公私其親也宣仁薦中宣諭曰遵裕喪師數十萬先帝緣此震驚邑邑成疾以至棄天下今肉未寒吾豈忍遽私骨肉而忘先帝乎即日批出曰遵裕得

次定四庫全書

續資治通鑑長編

罪先帝今來垂簾凡高氏推恩獨不可及遵裕確謀大沮後確責知安州作詩詆訕坐貶新州而邢恕乃確之心腹也偶與遵裕之子士京中山同官遂以垂簾時不推恩牽復事激怒之上書言王珪曾遣遵裕之子士充來議策立事遵裕斥去之士京庸懦不識字實恕教之為書士充疏遠小臣素不識珪珪安得與之議及社稷大計又何從輒通宮禁語言且上書時珪士充遵裕亦皆死矣何所考察江端友書詳見邵伯溫辨誣邵伯溫辨誣云邢恕教高士京上書論其父遵裕臨死時屏左右謂士京曰神宗彌留之際王珪遣士充來問我曰不知皇太后欲立誰我斥士充去恕曾不考遵裕既坐知慶州日靈武喪師貶散官神宗以皇太后故免安置留京師宣仁尤不喜遵裕雖該哲宗登極恩亦不許叙又安能預策立大計也按遵裕實以八年五月六日復右屯衛將軍策立大計遵裕固不能預矣所稱不許叙官更須考詳

已亥詔資政殿大學士銀青光祿大夫兼侍讀呂公著
乘傳赴闕

庚子朝奉大夫提舉京東路保馬兼保甲呂公雅知濠州 承議郎
同管勾京西路保馬兼保甲呂公雅知濠州

程顥為宗正寺丞

此據政目

詔提舉汴河堤岸司隸都水

監專一製造軍器所隸軍器監

舊錄云先帝導洛入汴繕完戎器於無事之日

皆專置司事得以舉至是歸之有司新錄辨曰導洛水
造軍器此非人君必躬必親之事先帝既置司何嘗不
歸之有司耶始則專置一司得以覈實事既就緒當有
統屬故各歸所隸是亦先帝之意也自先帝導洛至歸

之有司二十
九字並刪去

詔皇城使坊州團練使太原府路鈐轄

專管勾麟府路軍馬事張之諫降充郾延路都監以內

藏庫使康州刺史太原府路都監兼河東第一將訾虎

代之本路經畧使呂惠卿言之諫措置乖方與諸將不

叶故也

元祐元年六月劉摯劾呂惠卿違詔舉兵之諫言其不可故惠卿奏黜之之諫當考

戶

部狀檢會條勅諸路各量閑要州縣興置市易抵當僻

小縣分不可興置處不置看詳上件指揮止云僻小縣

分不置即慮其間亦有僻小州郡及雖不係僻小却別

無出產物貨不係商賈買賣去處須當一例興置不惟
所收息課不多虛有支破人吏請給兼恐監司專以趁
辦息課別致拘欄阻抑商旅在市買賣及諸般違礙誠
為未便欲乞下諸路提舉常平司委自本司官躬親逐
一體量及將自置市易抵當已來所收息數會較支費
如內有閑僻或不產貨物不係商賈買賣委實不銷興
置去處並具詣實保明申部看詳廢罷從之
五月八日
指揮法冊

有此合增入八
月八日可考

壬寅詔以築熙蘭通遠軍城堡成賜熙河蘭會路經畧
安撫制置使李憲銀絹各一百五十匹兩權管勾熙河
蘭會路經畧安撫司權發遣熙州趙濟銀絹各一百匹
兩仍各降詔獎諭 詔科場推恩依治平四年故事正
奏名進士諸科吏部給勅誥優牒特奏名中書給勅誥
優牒熙寧中悉罷今復之

甲辰詔門下侍郎章惇書受命寶以皇帝恭膺天命之
寶為文 朝請郎太府少卿宋彭年提點江南西路刑獄

詔京東西路提點刑獄李宜之體量都轉運司收出剩
減價支預買錢及大秤炭虧車戶等又詔吳居厚呂孝
廉並取勘

二事並據政目范
純粹奏議可考

詔御史中丞黃履舉堪

充監察御史二貲以聞河東節度使守太師致仕文

彥博言乞免兩鎮恩命或以需恩之行止乞加臣食邑

實封從之仍令學士院降詔

四月十四
日不許

詔知邵州關

杞保明到招納芙蓉石驛浮誠等峒人戶歸明其開路
採木獻田等有勞効者凡三百二十三人並轉資賜錢

帛有差以新歸順蕃部伏啜為下班殿侍

丙午資政殿大學士兼侍讀呂公著提舉中太一宮兼

集禧觀河東轉運提舉司言乞依威勝軍奏復置遼

州從之府界提點范岫步軍副都指揮使苗授開封

府推官王同老坐京城西壁等壕河有開淺虧功擅令

人出備夫錢等第罰金

政目云令開濠夫數工出錢三百文

是日酉時地

震即止詔府界三路巡尉弓兵並依保甲未行以前

復置

此據呂大防政目元年二月二日所書增入乃八年五月十四日指揮也

戊申詔舉察福建路前差監察御史黃降可改差比部

員外郎宇文昌齡其荆湖南路就差舉察江南西路監

察御史陳次升兼領

四月十四日差降及次升五月四日降改殿中七月二日張汝賢替

昌齡

鄜延路經略司言擒獲西界鈐轄鄂幹伊特詔送江

南羈管

己酉詔右僕射蔡確權領山陵使事以王珪病也

庚戌金紫光祿大夫守尚書左僕射兼門下侍郎岐國

公王珪卒輟視朝五月初贈太尉再贈太師謚文恭禮

部言當舉哀成服詔以大成服之

罷成服在二十八日庚申今並

書賜謚孫覺
有言當檢附

珪自輔政至宰相凡十六年無所建明守

成而已時號為三旨宰相以其上殿進呈云取聖旨上

可否訖又云領聖旨既退諭稟事者云已得聖旨故也

舊傳云珪議論平恕畏遠權勢引拔賢俊世莫知之珪
嘗三薦張璪不用珪曰璪果賢陛下未嘗用以為不賢
讒也臣恐士弗得進矣臣為宰相三薦賢三不用臣失
職請罷神宗喜曰宰相當如是朕以試卿卿德不回朕
復何慮珪為人寬抑不忤然至義理所在不可奪神宗
欲遷內侍李憲珪奏非祖宗故事陛下獨不監漢唐之
亂乎神宗批旨付珪獎之因令永為甲令世世守之自
輔政至宰相十六年終始不懈舊傳不知出誰手蓋多

諛辭新傳雖削去引拔賢俊世莫知之猶存薦張璟事不知珪果能辨此否已於璟參政時辨之又削去為人寬抑不忤然至義理所在不可奪猶存遷李憲事不知神宗欲遷憲何官而珪爭不可永為甲令又不知是何等事也章惇作珪挽辭亦載罷憲內職由珪及惇奏請恐珪及惇未必敢拂神宗意其後姑借此以迎合太皇太后耳憲罷內職時亦已辨之當考神宗親札御集又不編入不得不疑耳三旨宰相據鮮于綽傳信記綽又載珪數事今附見于此更俟參詳修入綽云二府中無土地祠而每位有不動尊佛堂蓋天王也大抵京師官府多塑天王如開封麴院之類皆如此王禹玉在兩府凡十餘年薨後有輕薄子戲為挽祠有東府自來無土地直須正授不須權蓋謂此也其全篇云太師贈誥子孫煎身後無名只有錢咭咭佞翻王特進孜孜留得宋昭宣欄干井上休言戲政事堂中不計年東府自來無土地直須正授不須權太師禹玉贈官元豐末經顧命

予孫陳乞皆援韓忠獻例故有子孫煎之句王特進謂介甫宋昭宣用臣也欄干井戲傳者謂親黨有勸乞出者禹云井子上欄干不是作劇處輕薄子為此詩納於獻紙贈箱中達之王氏子孫追尋不復知其誰何投牒開封乞根治府尹出榜立賞告捉竟不獲而詩因此大播有疑說譚話張山人為之者府尹呼詰之張山人沉吟曰此非某所能某尋常只是鼓合聚市井小人戲笑那裏做得他恁地著題官府為之闕笑又云禹玉自熙寧中拜相神宗聰明睿智以臨臣下新法百度已就禹玉無所建明但守成而已執政日久人有干差遣者每唯諾之而實無薦引也時人為之語云禹玉禹玉精神滿腹除却脫空十相具足又謂之三台宰相云

詔奉議郎吏部員外郎文及直龍圖閣知同州承事郎將作監主簿文永世候寺監丞有闕差及永世皆彥博

子以彥博乞免兩鎮節度使故有是命郎官除職自及
始樞密院言中書省已得旨應今年正月九日赦前
衝替人係事理重者減為稍重稍重者減為稍輕及差
替者便與差遣本院欲應武臣任六等差遣見降者未
牽復本等人如該正月九日并三月一日赦每赦與復
一等仍令刑部檢舉從之詔修京城使臣五十七員
可罷四十七員

此據政目
十八日事

癸丑尚書省奏刑部言合叙用人年七十以上者各乞

除叙法所得名目致仕內贓罪人仍不再叙未復舊官人願未叙者聽從之 龍賜州及監州知州彭允宗等四人各遣人修貢

丙辰正奏名進士劉逵等五百七十五人特奏名八百四十七人並釋褐武舉進士三十九人並賜袍笏銀帶

逵隨州人也

政目於五月六日書放進士焦蹈以下登科記焦蹈第一人劉逵乃第二人不知

何故焦蹈獨不釋褐逵與倪直侯注越州青州判官推官在七月二十三日今并附此

刑部言

趙譽等坐父世居常謀不軌除名停降鑠閉就增屋居

之 環慶路經略司蕃部巡檢貝等領兵入西夏
界至和爾原與賊戰有蕃弓箭手索幹昌愛獲西
界宥州正監軍偽駙馬葉結威明嘉勒其人乃任事酋首
乞優賞之詔索幹昌愛各轉三資賜絹五十匹
四月甲申當考
荆湖北路鈐轄轉運司言辰州江外生蠻覃仕穩等
乞納土歸明望許依辰州熊臯所申事理招納詔荆湖
北路不得妄有招納致生邊事 正議大夫新知杭州
呂公孺為龍圖閣直學士知鄆州 正議大夫戶部侍郎

李定承議郎給事中兼侍講蔡卞奉議郎起居舍人朱服各降一官坐知貢舉日開寶貢院遺火權知開封府蔡京判官胡及推官李士良各罰銅八斤坐救火延燒寺延及人口雖會赦特責之也

戊午通議大夫尚書右僕射兼中書侍郎蔡確守左僕射兼門下侍郎通議大夫知樞密院事韓縝守右僕射兼中書侍郎殿中侍御史黃降言縝不堪大用乞罷之不報

降言據蘇轍明年閏二月六日疏附見當考呂本中雜說神宗上僊王珪病薨蔡確遷左僕射

宣仁問確右僕射闕誰合做確對曰以即今班序論之即知樞密院事韓鎮合做若以祖宗故事論之則東廳參政合做東廳參政即今門下侍郎章惇也宣仁識確語意主惇因曰且只依令班序於是鑠院宣制知樞密院韓鎮遷右僕射神宗素輕韓鎮及簽書樞密院曾孝寬丁母憂去位已久孝寬為安石所厚上方惡安石恐安石之黨復挽孝寬還舊物遽從中批龍圖閣直學士韓鎮同知樞密院事宣仁亦素不喜鎮及蔡確力主章惇遂相鎮矣論者謂鎮神宗所不喜而神宗時作執政宣仁不喜而宣仁時為宰相通塞遲久皆有命也

通議大夫門下侍郎章惇知樞密院 資政殿學士通

議大夫司馬光錄門下侍郎初光以知陳州過闕未入對上疏曰臣先乞下詔廣開言路不以有官無官之人

並許進實封狀頒下諸路州軍於要鬧處出榜示鼓院
檢院州軍長吏不得抑退昨奉聖旨令入見及到京蒙
降中使以五月五日詔書賜臣看閱臣狂瞽妄言曲荷
采納豈獨微臣之幸抑亦天下之幸此乃聖主之先務
太平之本原也然臣伏讀詔書其間有愚心未安者不
敢不冒萬死極竭以聞竊見詔書始末之言固盡善矣
中間有云若乃陰有所懷犯非其分或扇搖機事之重
或迎合已行之令上則觀望朝廷之意以徼幸希進下

則銜惑流俗之情以干取虛譽審出於此苟不懲艾必
能亂俗害治然則黜罰之行是亦不得已也臣聞明主
推心以待其下而無所疑忌忠臣竭誠以事其上而無
所畏避故情無不通言無不盡今詔書求諫而逆以六
事防之臣以為人臣惟不上言上言則皆可以六事罪
之矣其所言或於羣臣有所褒貶則可以謂之陰有所
懷本職之外微有所涉則可以謂之犯非其分陳國家
安危大計則可以謂之扇搖機事之重或與朝旨暗合

則可以謂之迎合已行之令言新法之不便當改則可以謂之觀望朝廷之意言民間愁苦可憫則可以謂之街惑流俗之情然則天下之事無復可言者矣是詔書始於求諫而終於拒諫也臣恐天下之士益箝口結舌非國家之福也又止令御史臺出榜朝堂自非趨朝之人莫之得見所詢者狹伏望聖明於詔書中刪去中間一節如臣三月三十日所奏頒布天下使天下之人曉然知陛下務在求諫無拒諫之心各盡所懷不憂黜

罰如此則中外之事遠近之情如指諸掌矣既除門下
侍郎光又以劄子辭免乞對訖赴陳州并請更張新法
曰臣聞詩云毋念爾祖聿修厥德故夏遵禹訓商奉湯
典周守文武之法漢循高祖之律唐行太宗之制子孫
享有天祿咸數百年國家受天明命太祖太宗撥亂反
正混一區夏規模宏遠子孫承之百有餘年四海治安
風塵無警自生民以來罕有其比其法可謂善矣先帝
以睿智之性切於求治而王安石不達政體專用私見

變亂舊章誤先帝任使遂致民多失業閭里怨嗟陛下深知其弊即政之初變其一二懽呼之聲已洋溢於四海則人情所苦所願灼然可知陛下何憚而不并其餘悉更張哉譬如有人誤飲毒藥致成大病苟知其毒斯勿飲而已矣豈可云姑少減之俟積以歲月然後盡捨之哉臣向曾上言教閱保甲公私勞費而無所用之歛免役錢寬富而困貧以養浮浪之人使農民失業窮愁無告將官專制軍政州縣無權無以備倉猝萬一饑饉

盜賊羣起國家可憂此皆所害者大所及者衆先宜變
更借令皇帝陛下獨攬權綱猶當早發號令以解生民
之急救國家之禍收萬國之歡心復祖宗之令典況太皇
太后陛下同斷國事捨非而取是去害而就利於體甚
順何為而不可於是太皇太后遣中使梁惟簡賜手詔
諭令供職曰嗣君年德未高吾當同處萬務所賴方正
之士贊佐邦國竊欲與卿商量政事卿又何辭再降詔
開言路須卿供職施行光乃受命 資政殿學士知太

原府呂惠卿為資政殿大學士端明殿學士知江寧府

王安禮為資政殿學士翰林學士曾布為戶部尚書試

戶部尚書王存為兵部尚書

曾肇作王存墓誌云存為兵部尚書遷戶部會神宗

山陵財費仰給戶部不踰時告乏而宰相乘間徙存復為兵部充山陵鹵簿使元祐初復還戶部固辭廷受識者韙之不知肇所稱宰相乘間果何事也存徙曾布實代之布集有年譜乃云司馬公用布為戶部尚書按光除門下侍郎與布同日光才執政元未入對那得有此事蓋年譜妄說也布此除實出於蔡確等疑必有曲折肇亦不能為布隱當徐考之元祐元年閏二月十六日劉摯有章二十二日布出知太原紹興初翟璜言劉摯謂大臣誤朝廷而大臣所用者又誤大臣蓋指布也章䟽具載國史皆可覆考布子紡釋誣云璜載劉莘老章

疏是論募役不可行之語蓋劉華老在熙寧以差役為不可行反覆辨論至數千言然募役之法不出於王荆公蓋自嘉祐二年韓康公奉使河朔回建明差役之法為牙校者至於破產却以場務裨酬非良法乞令輸錢入官以庶人在官之祿募游手充役李邦直元祐中作韓康公碑具載其事自嘉祐討論至熙寧方成法耳元祐中蘇子瞻子由兄弟力主募役法為不可改蓋以出於韓子華不出於王荆公故也劉華老既補外歟歷州縣乃知募役為良法雖緣役法左遷流落於外十餘年及元祐初擢為御史中丞可以行其所知矣不復深論自知前日之非也元豐末司馬光召為門下侍郎至朝廷首議行遣熙寧元豐聚斂刻剝之臣故吳居厚楊偁呂惠卿之徒相繼痛貶而力引先公為戶部尚書劉華老為御史中丞若先公在熙寧助王氏為刻剝之政司馬溫公肯寘之版曹乎劉華老與先公在熙寧爭論役法及為中司知役法不可廢故不復深論果以先公所

論為非既為中司肯貸先公使安地官之職乎先公與
劉莘老同時除授來年先公以食貧請外加龍圖閣學
士知太原府劉莘老卒無一字見及近日福建印一骨
鯁集有劉莘老論先公章疏乃是選人徐方叔撰造曾
經朝廷行遣開封府自有公案元祐初行遣熙寧元豐
人皆散官安置此疏但云乞移一近京閑慢差遣自不
成章疏當時已為笑端元祐末先公自青社易高陽劉
莘老罷相鎮東平惓然相迎延留不已至是為樂語云
功名雅在於本朝譽望最先於諸老又云金鑾學士曾
謀國玉塞將軍又得人至手書一通面投云皆摯親草
其相喜如此先公為留五日況國史具載自有除授月
日可以考驗璜敢變亂是非誕慢如此後法始於韓氏
璜猶不知況其他乎不能克家安能立朝也此皆紡所
云今畧辨之紡云司馬君實引布為戶書按布為戶書
與君實除門侍同日紡妄也已辨之於前紡又云吳居
厚楊伋呂惠卿之徒相繼痛貶君實力引布為戶書按

三人痛貶月日具在皆是布為戶書後事元豐八年十月十七日吳居厚以前京東運使散官安置黃州元祐元年三月二十二日楊伋罷戶侍為寶置知廣州呂惠卿以大資政知揚州提舉崇福二人皆引疾從其請也蓋初行遣熙豐人除吳居厚餘人皆未嘗便散官安置紡所云誤元豐八年九月十八日劉摯初自少蓬為侍御史元祐元年二月十二日乃除中丞元祐元年閏二月十六日摯上章乞罷布戶書二十三日布出知太原摯集今不載此章遺藁仍具載月日可考紡蓋諱之所云徐方叔曾經行遣不知是何年月日紡又云國史具載除授月日今考之國史乃皆不然

兵部侍郎許將為龍圖閣直學

士知成都府龍圖閣直學士知成都府呂大防為翰林學士龍圖閣待制知青州鄧綰為龍圖閣直學士知永

興軍龍圖閣直學士知永興軍劉庠知青州

六月戊寅十六日復

故七月庚戌十八日再任

詔環慶路經畧使趙高權發遣廊延路

經畧司事劉昌祚各具錄到任後專授御前指揮以聞

中散大夫知冀州王令圖知澶州

政目二十六日

庚申左僕射蔡確為山陵使是月罷徐州寶豐下監

鼓鑄鐵錢

此據范純粹奏議增入純粹云自吳居厚置監鼓鑄至今年五月得旨住罷未及一年已

支用過官錢八萬九千八百八十餘貫而搬運至陝西脚乘廉費又不在此數云云當考或刪取增入寶錄在

九月十九日庚戌十月十三日甲戌神宗史志元豐六年徐州置寶豐監鑄銅錢此云鐵錢當考

西

賊犯廊延路供奉官王英戰死

此據劉摯王覲劾惠卿章疏增入摯云西人復

仇以五月犯塞疆臣戰歿士卒陷亡今實錄乃無此當
考覲云供奉官王英以戰死兵士陷歿者六千餘人不
知王英戰死處是何城塞當考八月十
四日錄王英二子英死處實葭蘆寨也

